

Na osnovu člana 10. stav (1) tačka c) i čl. 13. i 25. Zakona o poljoprivredi, ishrani i ruralnom razvoju Bosne i Hercegovine („Službeni glasnik BiH“, broj 50/08) i člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Ministarstva vanjske trgovine i ekonomskih odnosa Bosne i Hercegovine, na 91. sjednici održanoj 17.juna 2009. godine, donijelo je

ODLUKU

O USPOSTAVI UREDA ZA HARMONIZACIJU I KOORDINACIJU SISTEMA PLAĆANJA U POLJOPRIVREDI, ISHRANI I RURALNOM RAZVOJU BOSNE I HERCEGOVINE

Član 1.

(Predmet, cilj i sjedište)

(1) Ovom Odlukom se uspostavlja Ured za harmonizaciju i koordinaciju sistema plaćanja u poljoprivredi, ishrani i ruralnom razvoju Bosne i Hercegovinu (u daljem tekstu: Ured za harmonizaciju i koordinaciju sistema plaćanja) u cilju osiguranja transparentnosti i koordinacije sistema plaćanja u Bosni i Hercegovini i u svrhu podrške mjerama politike i postepenog prilagođavanja sistema plaćanja sa sistemom Evropske unije, te propisuje nadležnost, mehanizmi upravljanja, ostvarivanje saradnje i druga pitanja od značaja za rad Ureda za harmonizaciju i koordinaciju sistema plaćanja.

(2) Ured za harmonizaciju i koordinaciju sistema plaćanja je upravna organizacija u sastavu Ministarstva vanjske trgovine i ekonomskih odnosa Bosne i Hercegovine (u daljem tekstu: Ministarstvo).

(3) Ured za harmonizaciju i koordinaciju sistema plaćanja ima svojstvo pravnog lica sa svim pravima i odgovornostima iz svoje nadležnosti.

(4) Sjedište Ureda za harmonizaciju i koordinaciju sistema plaćanja nalazi se u Istočnom Sarajevu.

Član 2.

(Zadaci)

U okviru svoje nadležnosti propisane članom 13. Zakona o poljoprivredi, ishrani i ruralnom razvoju Bosne i Hercegovine („Službeni glasnik BiH“, broj 50/08), (u daljem tekstu: Zakon), Ured za harmonizaciju i koordinaciju sistema plaćanja, u saradnji sa nadležnim organima entiteta i Brčko Distrikta Bosne i Hercegovine (u daljem tekstu: Brčko Distrikt), obavlja slijedeće poslove:

- a) razvija pravni okvir za uspostavu i razvoj institucionalnih struktura za podršku u provođenju mjera politike i privlačenja sredstava Evropske unije (u daljem tekstu: EU) i sredstava iz drugih međunarodnih fondova;
- b) uspostavlja jedinstvene prakse i procedure funkcija odobravanja, izvršenja i računovodstvenih transakcija u sektoru poljoprivrede, ishrane i ruralnog razvoja, koje će biti primijenjene u entitetima i Brčko Distriktu;
- c) usaglašava sistem upravne kontrole koji će osigurati transparentnost i dostupnost podataka o svim mjerama podrške i isplatama;
- d) uspostavlja funkcije kontrole;
- e) promovira ujednačenu primjenu procedura za isplate i zahtjeve na svim nivoima, a koji su u skladu sa pravilima EU;
- f) koordinira obuku osoblja na svim nivoima kako bi se osigurala jedinstvena primjena procedura i ispravno provođenje mjera;
- g) pruža pomoć u uspostavi registara iz člana 14. Zakona i drugih evidencija i koordinira rad odgovarajućih službi tehničkih timova na svim nivoima u svrhu konzistentne primjene sistema referentne registracije i sistema skladištenja podataka u okviru sveobuhvatnog tehničkog okvira;

- h) ostvaruje komunikaciju sa platnim organizacijama i drugim internim i eksternim organima u pogledu procedura i razmjene podataka u statističke i druge svrhe po zahtjevu;
- i) uspostavlja efektivni harmonizirani sistem monitoringa i evaluacije u skladu sa najboljom evropskom praksom;
- j) identifikira i pomaže u razvoju drugih relevantnih službi s ciljem promoviranja poljoprivrednih i prehrambenih proizvoda;
- k) identifikira i pomaže u razvoju i provođenju mjera uvozno-izvoznog režima i intervencije na tržištu.

Član 3.

(Rukovodstvo)

(1) Uredom za harmonizaciju i koordinaciju sistema plaćanja rukovodi direktor u saradnji sa zamjenikom direktora i savjetnikom direktora.

(2) Direktora, zamjenika direktora i savjetnika direktora Ureda za harmonizaciju i koordinaciju sistema plaćanja imenuje Vijeće ministara Bosne i Hercegovine (u daljem tekstu: Vijeće ministara) na period od četiri godine, s tim da na istu funkciju mogu biti imenovani još jedan mandat.

(3) Direktor, zamjenik direktora i savjetnik direktora ne mogu biti iz reda istog konstitutivnog naroda Bosne i Hercegovine.

(4) Direktor, zamjenik direktora i savjetnik direktora za svoj rad odgovorni su ministru vanjske trgovine i ekonomskih odnosa.

Član 4.

(Pravilnik)

(1) Unutrašnja organizacija i sistematizacija radnih mjesta, kao i način rada Ureda za harmonizaciju i koordinaciju sistema plaćanja utvrđuje se Pravilnikom o unutrašnjoj

organizaciji, kojeg donosi ministar vanjske trgovine i ekonomskih odnosa uz saglasnost Vijeća ministara.

(2) U roku od 30 dana od dana imenovanja lica iz člana 3. stav (1) ove Odluke, ministar vanjske trgovine i ekonomskih odnosa dužan je donijeti Pravilnik iz stava (1) ovog člana.

Član 5.

(Saradnja)

Ministarstvo ostvaruje saradnju sa nadležnim organima entiteta i Brčko Distrikta koji su obavezni, unutar svoje nadležnosti, osigurati ispunjenje zadataka Ureda za harmonizaciju i koordinaciju sistema plaćanja navedenih u članu 2. ove Odluke.

Član 6.

(Finansiranje)

Rad Ureda za harmonizaciju i koordinaciju sistema plaćanja se finansira iz budžeta institucija Bosne i Hercegovine i međunarodnih obaveza Bosne i Hercegovine.

Član 7.

(Stupanje na snagu)

Ova Odluka stupa na snagu danom donošenja i objavljuje se u „Službenom glasniku BiH“.

VM broj _____/09.

17. juna 2009. godine

Sarajevo

Predsjedavajući

Vijeća ministara BiH

dr. Nikola Špirić